


«Uss be anc las vischnancas da l'Alvra e dal Partenz»

Radunanza generala da la CI vischnancas concessiunaras

■ (anr/fa) **La Cuminanza d'interess vischnancas concessiunaras grischunas s'engascha dapi dus onns per defender ses interess envers autoritads e privats. Nov fan part dad ella era las vischnancas concessiunaras sursilvanas** «Sco fixà en la lescha davart il dretg da las auas han las vischnancas grischunas il dretg da trair a niz las auas per producir energia», declera *Not Carl*, il president da la Corporaziun dals cumüns concessiunaras da las Ouvras electricas d'Engiadina. Passa dus terzs da las vischnancas en Grischun fan adiever da questa pussaivladad e retiran, sco ch'el cuntinua, mintg'onn bundant 40 milliuns francs tschains d'aua sco er entradas da taglia considerablas. Per bleras vischnancas surtut en la periferia signifigan questas entradas ina gronda part da lur entradas totalas. Quai possibilitescha al chantun da mantegnair sia colonisaziun decentrala. Per defender ils interess ed ils dretgs da las 48 vischnancas concessiunaras han ils represchentants da las ovras electricas d'Engiadina, dal Rain posteriuor e da Zervreila fundà il mars 2012 la Cuminanza d'interess vischnancas concessiunaras grischunas (CIVC). Glindesdi ha salvà la CIVC a Cuira sia segunda radunanza generala.

«Regenza satisfatga da questa fundaziun»

Da la suprastanza faschevan part fin uss



La Cuminanza d'interess vischnancas concessiunaras grischunas s'engascha dapi dus onns per defender ses interess envers autoritads e privats.

FOTO N. SIMMEN

ultra dal president *Not Carl* da Scuol *Alfons Jörger* da Val e *Bernard Semadeni* dal Andeer. Il secretariat maina la vischnanca da Val cun ses chanzlist *Reto Jörger*. En ses rapport presidial ha menziunà *Carl* la reacziun da cusseglier guvernativ *Mario*

Cavigelli a la fundaziun da la CIVC: «Il pass dad unir uschia ils interess da las vischnancas cooperativas sco organisaziun da contact dal chantun è dretg, aveva ditg *Cavigelli* quella giada.» Dapi sia fundaziun ha la CIVC organisà differen-

tas orientaziuns e referats e scrit era comunicaziuns da pressa, «cun la finamira da defender noss interess e da chattar sco partenari dal chantun cuminaivlamain soluziuns satisfacentas per l'utilisaziun da l'aua en Grischun.» Ins haja pudì con-

statar che la collavuraziun da las vischnancas concessiunaras las dettia ina vusch cun dapli pais en las tractativas cun chantun ed ovras, ha ditg *Not Carl*. Da quel avis èn er ils responsabels da las 12 vischnancas concessiunaras da la Surselva che represchantan l'Ovra electrica dal Rain anteriur e da differentas ovras pli pitschnas.

Novs commembers da la CIVC

La radunanza generala ha approvà unanimamain il midament da l'artitgel 3 da lur statuts. Quest midament era necessari per pudair possibilitar l'adesiun da las vischnancas concessiunaras sursilvanas a la CIVC. Unanimamain han fatg bun ils preschents quella dumonda d'adesiun. «Uss fan part era las vischnancas concessiunaras da la Survelva da nossa cuminanza d'interess», ha ditg *Not Carl*, «uss mancan be anc las vischnancas da l'Alvra e quellas dal Partenz.» Sco successur dad *Alfons Jörger* en suprastanza ha elegì la radunanza *Georg Anton Buchli* da Versomi, il president da las vischnancas concessiunaras da l'ovra Zervreila (KOKWZ). Sco represchantant da las vischnancas concessiunaras da la Surselva è vegnì tschernì en suprastanza *Walter Deplazes* da Surrein. «Nossa pli gronda sfida vegnan ad esser las scadenzas da las concessiuns ch'ins ha dà a las ovras electricas», ha dà il president da la CIVC *Not Carl* in sguard vers l'avegnir.